

度

支

奏

議

度支奏議目錄

陝西司三卷

覆梁大司馬條議茶法疏

覆西寧旱地徵糧事宜疏

覆陝西饑荒督撫按道多方設法賑助疏

覆宣大等鎮邊餉仍舊四季差官解發疏

覆陝西延慶等處蠲緩賑卹疏

覆延安民運緩征疏

覆合水縣造餉襍項蠲免一年疏

度支奏議卷之三

太子太保戶部尚書潘青畢自嚴視草

覆梁大司馬條議茶法疏

題爲直陳釐弊之要以裕

國用事陝西清吏司案呈准新餉司付崇禎三年  
十月十四日奉本部送戶科抄出太子少保兵  
部尚書梁廷棟題前事等因本年十月十二日  
奉

聖旨覽奏具關兵食大計屯政欲清地額須治豪強

鹽法欲禁私販須屏請託鑄錢欲杜低假須嚴核  
報茶司欲收番馬須革商票各款俱切中要弊鑒  
然可行該部還將每項單疏議覆近來吏治日偷  
不講積貯猝有緩急輒苦無策今後著撫按嚴督  
各地方官積穀備荒不時設法查驗仍每年造冊  
報部考核不得循例以空數塞責如有擅取贖銀  
緩視公儲者定寘重典不饒該部院卽條議規約  
來看該衙門知道欽此欽遵抄出到部送司查得  
疏內茶法一款事隸陝西司掌行相應移付單

疏議覆等因到司案呈到部該臣等看得陝省迤西一帶河洮甘肅等處密邇西域地隣番族番土多產駿馬而番衆以茶爲命是以

祖宗朝欲控制西番特設茶馬司復設巡茶御史以董之收貯官茶無容私販卽以官茶易彼番馬收贖贖以實邊而邊無外耗繫番漢以制虜而虜絕內窺此誠固圉安邊之長計也邇來日久弊生當事者不爲履霜之戒牟利者多爲登壘之謀且于正引之外附給票茶且又易番之斛

復與虜市於是私茶行而官茶壅於是上駟少而款段多蓋商人射利何苦而不與番作緣而番旣厭欲何憚而不與我爲梗則撫番之法壞矣茶積不行馬必日少在筦茶者急於疏引不難以虜下馬易我上茶而虜市遂開且虜復掠番馬爲利藪我又棄番利爲虜資則制虜之法亦壞矣撤藩籬而窺堂奧啓戎心而弛邊防全在於此樞臣向者身歷其地目擊最真條議上請鑿鑿中窾誠救時之鍼砭而固圉之韜鈴也及今

不爲申飭將成不返之勢然與其臣等之諄諄  
條議總不如任事者之實實奉行伏乞

勅下巡茶御史及筦茶官員盡革票茶嚴禁私販與  
洪水之引虜馬之市凡非

祖制悉行奏

請改正儻有仍踵前弊者商販必置重  
一併議處務使利歸於

國虜不爲釁而諸番且世世奉約束矣旣經樞臣  
具題前來相應覆

瘦枝奏議

請恭候

奉下臣部移咨陝西甘肅各巡撫及咨都察院轉行  
陝西巡茶御史一體遵奉施行

崇禎三年十一月十六日具

題本月二十日奉

聖旨官茶易馬充實邊備控馭虜番最關大計近來  
奸弊日滋以致茶壅馬乏撤防起爨深可痛恨著  
行該撫及巡茶御史嚴加釐飭凡票茶私販虜市  
洪水之引等弊盡行禁革務期一遵



庭制未固邊疆如有仍踵前轍商販并筦茶各官一體重治文到之日該撫按先具釐革規條詳明回奏該衙門知道欽此

覆西寧旱地徵糧事宜疏

題爲奉

旨回奏事陝西清吏司案呈崇禎三年十月二十九  
日奉本部送戶科抄出總督陝西三邊都察院  
右都御史兼兵部右侍郎楊鶴題前事內開據  
陝西西寧兵備道按察使王維章查出堪種拋  
荒水田徧招屯民墾種各投認狀照則坐糧共  
認糧九百五十五石三升四合認草九千五百  
五十束零又副總兵梁甫捐養廉舖房二十六

間聽居民賃住認糧六十五石認草六百五十  
束連前地畝通共認糧一千二十石三升四合  
草一萬二百束零地畝所納者照例三年起科  
舖房所納者卽於當年催徵屯民俱各樂輸認  
狀甘結可憑又查出西寧水地十分之三旱地  
十分之七旱地從來顆粒不納今歲每種子一  
石納糧一斗草一束每歲納糧一萬餘石草十  
萬餘束寬其從前欺隱之罪計種徵糧姑以崇  
禎三年爲始正在清查擬則派定糧草數目待

事定具題嗣後風聞西寧爲旱地加糧地方  
豪糾衆鼓譟該督撫旋發示曉諭安戢續據該  
道稟稱官民俱已情願輸納約可增糧三四千  
石及議調王維章涼州等因崇禎三年十月二  
十八日奉

聖旨據奏西寧旱地無糧該道履畝薄征原經詳允  
奸民旋譟旋戢各已認額願輸是否確情該部還  
從公覈議奏奪王維章平日治行何收且修屯伊  
始如何更調涼州一併查明具覆楊鶴著益用心

視事不必引咎該衙門知道欽此欽遵抄出到部  
送司案呈到部該臣等看得

國初屯田之制自內地以及邊境凡有荒閒田土  
悉令衛所撥軍開墾歲收子粒卽爲軍糧以省  
餽餉此

令甲也事久失實邊地之荒蕪日多豪強之隱佔  
又甚

聖明中天留心屯制臣部見在覈實舉行今按西寧  
卽古湟中地趙充國嘗以屯田制虜矣道臣王

維章躬履其地既查其水田拋荒者千餘石復發其旱地無糧者萬餘石且仍寬從前之欺隱薄向後之催徵如種子一石歲可收十石而僅徵一斗不過取什一於千百似亦無甚難爲者而地方軍民乃以藉口起譁何也據督臣楊鶴纒纒而陳謂此方軍民種此無糧田地積有歲年一旦派徵自非情願及檄下所司稍爲撫諭旋即帖服認輸是始之譟者出於護私繼而戢者屈於奉公督臣之爲地方調停亦具見苦心

矣臣爲持平而論邊地汗邪總屬

朝廷則壤且屯田拋荒影占實不盡無督臣所擬增  
加既有次第若復因地方之煽競旋即停止益  
長奸民詭冒之心屯政之難行此實其一端也  
但事難慮始法期垂遠似應仍令督臣再行清  
查如水田拋荒者之三年起科無容說矣至於  
旱地無糧者核其等第之高下定爲糧數之多  
寡軍地不以民地濶無糧者不以有糧者濶酌  
定清數奏

請覆行俾邊民無朘削之苦而邊軍有儲胥之實斯  
兩得之矣至如道臣王維章涼州之更調何因  
平日之治行何狀此在銓臣自應遵  
旨覆奏非臣部所敢越俎也既經督臣回  
奏前來欽奉從公覈議

明旨相應覆

請恭候

命下臣部移文陝西督撫一體遵奉施行

崇禎三年十一月二十八日具



題十二月初二日奉

聖旨這西寧旱地徵糧事宜著督臣楊鶴查核酌定  
具奏如有勢豪不便欺隱鼓衆譁議的定以軍法  
重治欽此

覆陝西饑荒督撫按道多方設法賑助疏  
題爲秦地之寇起於民饑平寇之要先於救民之  
饑本地之財自足本地之賑濟要在當事之實  
心撙括本地之兵自足本地之堵剿要在當事  
之實力清查懇乞

聖明嚴加責成及早撲滅無徒憑其空言卸罪釀禍  
蔓延事陝西清吏司案呈崇禎三年十二月初  
九日奉本部送戶科抄出兵科署科事左給事  
中今降二級照舊管事劉懋題前事內開秦地

之寇起於民饑今則蔓延據晉臨河州縣而興  
販絕徧燒村庄而糴買絕曰諭曰剿曰撫諭猶  
空言剿不勝剿莫如先撫撫亦未易三府之廣  
須金十萬不然亦須五六萬請之

內帑不可借之司農無措莫如撙之秦中八院并  
司道府廳公費犒賞修理銀兩及州縣會銀等  
項巡方貯庫餘剩贓罰限兩不足再益以驛站  
裁節總計通省可得六七萬見徵在官不煩遠  
括姑借一歲以救民死至合剿用兵四衛二十

所兵丁按籍查之而兵自在屯糧除兌支官軍  
外先年尚剩萬餘石入倉今顆粒烏有按數查  
之亦可以佐軍興及請飭巡方拏問貪酷府佐  
州縣等官等因崇禎三年十二月初七日奉

聖旨各省直屯軍民壯皆可爲兵儲積贖緩皆可充  
餉撫按道府有司果從公家起見拊綏制禦自可  
有備無患乃近來於簡練兵丁一事絕不經心賦  
羨支存盡充囊橐濫交際一旦有警但知請兵請  
餉積習不悛殊可痛恨至於邊疆災疲處所多選

科甲不知幾經申飭吏部竟不遵行勦賊事宜已  
有屢旨了這本語多可採着與覆行該部知道欽  
此欽遵抄出到部送司查得疏內招撫三府饑  
民湏金十萬或五六萬撙取本省各院公費犒  
賞司道府修理銀兩各州縣會銀巡方貯庫餘  
剩賊罰相應照疏具覆其  
節省新奉

明旨酌留征勦軍費無容別議  
四衛屯糧原有麥  
豆萬餘石可佐軍興亦應照數覆查其查核屯  
兵孥間貪酷應聽吏兵二部覆行案呈到部該

臣等看得秦中流賊之發難也所從來久矣延慶平三郡比來數歲不登鴻鴈此雖又邇者亂兵乘逋以作唱饑民靡附以偷生加以有司不善撫循獸窮則攫民窮則亂一處竊發四封騷擾蔓延至於今日且逼晉陽窺澤潞矣廷臣交章皆有履霜之虞而科臣劉懋戒心維桑畢慮前籌如曰諭曰剿曰撫疊疊言之且復問衛所而嘆尺籍之空虛恨貪婪而請繡斧之彈治救時急着寧有易此者乎乃按伍以核兵則樞部

事也飭吏以安民則銓曹司也如議撫而及於  
賑議賑而及於撥括庫貯借資裁節以至稽覈  
屯糧之有無此皆臣部職掌寧容無說而處此  
查向者延屬荒盜頻仍督撫諸臣連章

上聞諸蠲請賑業奉

明旨延郡元二兩年遼餉特准蠲免又留西安三年  
分遼餉一萬兩聽撫臣洪承疇設法賑濟矣其  
西漢慶平諸府原設兵荒稅課等銀亦著該撫  
按調劑處矣

睿照徹逃亡之部屋河西父老一聞

德音當無不扶杖而快更生者卽在事諸臣亦當無  
不悉心以副

明旨者然臣思之災疲改免之疏無歲不上也而民  
需實惠者有幾冬春者粥之法無地不行也而  
民需實惠者有幾卽二年間該省撫按亦曾題  
借罪撫喬應甲贓銀三萬六千賑恤矣而荒盜  
何以至今不止也今且延慶平三府無處不荒  
無處不亂矣不賑是以地方棄也賑之又難以



涓滴施也臣就科臣之議一斟酌之如驛站裁  
節之銀奉

旨業留該省三萬爲征勦用此外果有贏餘諒兵部  
不靳也至各院道之公費修理各州縣之會銀  
巡方貯庫之贓罰雖云爲數無幾何莫非官錢  
也但各州縣有大小不同各州縣荒盜有輕重  
不同其賑之數不可預定其賑之實更不可冒  
破也應令該撫按司道親督各州縣巡行閭里  
設法賑助仍下之令曰民有向爲盜今復業者

免其罪安集者資以籽種某州縣應用賑濟銀若干姑就本州縣現貯公費贓罰等銀支用有不足者或本州縣另行設處或本司道代爲措處大約就科臣所指撥用之數而該省賑濟已十得其八九矣自是招戢有方饑民安堵者卽爲循卓之最撫按擇其尤者特疏題

請旌擢近撫臣沈葆楨有議曰

國家當公私交紉時外臣當自爲設處業蒙

明旨褒嘉矣諒地方官利害相關亦當無不旨斯言

也倘一處安戢得法饑民復業處處因而肯然則流賊不平而自散地方不勦而自安矣漢龔遂爲渤海勞來循行開倉賑貧盜賊卽時解散買牛買犢之語至今傳焉彼何人哉事已急矣似不可緩此一着也至四衛屯糧科臣謂先年除官軍充支外尚可剩麥豆萬餘石入倉今且顆粒烏有矣前何以剩今何以沒似當責令清軍道臣按籍稽查徹底追究以稍助軍興者也伏乞

勅下臣部移咨陝西督撫并咨都察院轉行陝西巡按御史遵奉施行仍將動支過銀數招撫過饑民造冊報部以憑查考

崇禎三年十二月二十三日具

題本月二十五日奉

聖旨陝西歲歉民饑地方官若能安集拊循豈至寇盜充斥攬奏延慶平兵荒待賑楊鶴題留裁站銀兩已有旨了這公費會銀及貯庫贓罰等項俱着該督撫按道率屬搜節并多方措處設法賑助隨

地撫綏仍將用過銀數賑過饑民造冊奏繳以便  
課覈至四衛屯糧麥豆昔旣贏剩今何獨無卽着  
清軍道臣按籍詳查用佐軍費該衙門知道欽此

題宣大等鎮邊餉仍舊四季差官解發疏

題爲轉餉不可稍遲多差又虞滋擾謹酌議事宜

恭請

聖裁事山西陝西清吏司案呈各邊鎮月餉銀兩每年俱係四季題差專官解運崇禎三年三月內該本部慮恐多差滋擾議將四差舊例改併兩差夫馬車輛額有定數復將道里遠近分限月日俱經題奉

欽依遵行在卷續於三年八月初三日該薊遼總督

張鳳翼具題爲亟請軍餉等事奉

旨下部將各鎮應發月餉責令按月

奏報遵行間又奉本部送准兵部咨文爲奉差違  
旨背例不遵倒換勘合無端挾制毆辱職官等事兵  
科抄出兵部尚書梁廷棟題前事等因奉

聖旨近來貲郎營差歸里枉道騷擾驛遞甚至往返  
止須數日水陸糜費不貲是何名義王啓曆增改  
郵符辱官苛索着革了職提問擬罪禁例方嚴寧  
夏往回何故填註寧太倒換倪嘉慶徇情沿習一

併議罰其奉差給驛道里月日久近事宜酌妥來  
行該部知道欽此欽遵又該吏部尚書王永光題  
同前事等因奉

聖旨倪嘉慶依擬罰俸半年凡差官勘合應於某處  
換給回還該部科還議定規例具奏既經申飭之  
後該司遵例填註不許假借徇私該衙門知道欽  
此欽遵咨行到部准此合咨戶部遵照節次

明旨內事理即將題差官員酌量道路月日久近定  
限回還事宜議妥咨覆以便具題等因到司奉



此查得月餉方急差規仍須另議未經酌妥不  
便奉行相應題

請案呈到部該臣等看得各邊地方有在千里之內  
者宜大三關等處是也有在千里之外或二三  
千里之外者延綏寧夏甘肅固原下馬關等處  
是也一切年例銀兩從來俱係四季差官分投  
押解或一時不能如額盡發方准該鎮委官不  
時討領不但間關險阻必須重以

王命然後可爲剽掠之防亦使嚴塞官軍感激我

皇上鴻恩恤勞瘁而重

勅使耳曩歲因各差官領解銀兩或不過數千金途  
遠差繁未免爲驛遞之擾嗣該臣部申飭每差  
解數雖少亦湏萬金客歲勇儆戒嚴議政四季  
爲兩季併差起解又因臣部司官有限間用別  
部及

兩殿中書然議中書夫數止限二十名馬數止限  
十匹屬在陝西各鎮者道路頗遠議以八個月  
爲限屬在宣大各鎮者道路少近議以六個月

爲限期而不至者卽行查叅業奉

俞旨遵行矣嗣蒙

皇上重軫封疆將各邊鎮月餉銀兩責令臣部按月奏報是則一年兩解之法仍合更定而奉差無狀又恐如中書王啓曆者不少也躊躇再四欲令各該鎮委官自領似可免騷動之虞但各委未能如期而至而近日又見秦撫練國事特叅誤委失餉一疏至以一萬六千之餉銀爲候缺經歷王元璿拐去則錢糧重大委官自領之計亦

屬未妥今於萬不獲已之中謬爲酌處除關薊等處額支新餉且地方原近應遵按月奏報之旨如數給發外至於宜大三關延寧甘固等處俱用京邊舊餉第外解每多愆期而銀數未易措手茲斟酌於按月

奏報及一年兩解之規合無仍遵

舊制照依四季解發但每季銀數務足年例四分之  
一坐名題差催解期已踰外解不敷者不妨量  
欠些須俟該鎮委官補領銀數旣多差員漸少

亦可少示裁節所有題奉官員先儘用部司屬  
間借別部及

兩殿中書仍取該衙門結款爲據每銀一萬給車  
一輛除司官夫馬原有

欽定數目其中書等官臣部原議夫二十名馬十匹  
今查新定則例夫二十四名馬四匹驢二頭應  
遵新例爲準其押解銀兩務到彼中交割明白  
回京勘合仍用兵部原發不必再行倒換無論  
司官中書倘能刻期復

命不圖以畫錦爲榮者仍許照原額應付亦以實  
使命而昭畫一之法守也勘合卽明註錄其路回京  
字樣不許朦朧過家如或借便歸里則乘傳之  
符豈徒爲誇耀之具合將原議夫馬裁減三分  
之一勘合亦須開列明白以便稽考庶公務私  
情兩不相礙耳若道路遠近時日久暫似應仍  
如前議陝西限八個月山西限六個月依期報  
命其有不遵限期逍遙里舍者三尺具在臣部斷不  
能爲之假貸也旣經各該司案呈前來相應題

請恭候

命下臣部一體遵照施行

崇禎四年二月初一日具

題本月初三日奉

聖旨宣大等鎮邊餉仍舊四季解發併差官應付定  
限事宜俱依擬奉差乘便歸家前已有旨嚴禁不  
得又漸開端但以裁減夫馬委曲假借該衙門知  
道欽此

覆陝西延慶等處蠲緩賑卹疏

題爲奉

命賑秦敬陳一得仰祈

聖裁以便遵行事陝西清吏司案呈奉本部送戶科  
抄出山東道監察御史吳姓題前事內開奉

旨賑資秦民臚列要務六款守令宜擇監司宜補責  
成宜嚴緩急宜酌安插宜議徵求宜寬秦中如  
延緩慶平等處災荒洊至有司者旣鮮芻牧之  
求復嚴催科之令皮骨已盡救死不贍不得已



迫而爲盜今業

遣臣賑濟而州縣復日鞭笞其民以責逋負則何賑  
之能濟聞崇禎三年以前已經免訖其四年分  
一切錢糧尚未奉

旨臣願早渙

德音將被災地方特賜蠲免徵俟年豐盜息之後徐  
議徵收等因崇禎四年二月初四日奉

聖旨這奏內諸款如選補監司守令責成督撫鎮將  
已屢有明旨其酌緩急議安插相機舉行至錢糧

應蠲停的戶部先開具某州縣某款項來看未盡  
事宜仍着吳姓到地方日詢究明白具奏該部知  
道欽此又該巡撫陝西等處地方都察院右僉都  
御史練國事題爲秦中災荒三府爲甚新增餉  
銀萬難槩派謹據實控陳仰祈

聖恩特豁以恤子遺事內開延慶平三府向被流賊  
殘破卽前加九釐元二兩年奉

旨蠲免又延慶平三府遠餉民運奉

旨緩徵今若每畝再加三釐實難應命乞將延慶平

三府加派銀數特賜蠲免等因奉

聖旨戶部查議具覆欽此欽遵各抄出到部送司查  
得疏內選補監司守令責成督撫鎮將酌緩急  
議安插相機舉行并未盡事宜俱奉

明旨無容議覆至錢糧應蠲停的并陝西巡撫請免  
延慶平加派相應一并具覆案查崇禎二年該  
本部覆行人馬懋才疏將延慶府屬安塞安定  
保安膚施甘泉清澗綏德米脂府谷合水延長  
延川安化寧州災荒州縣民運錢糧議停緩徵

至加派遼餉該本部覆兵部尚書梁廷棟題爲  
恭報微臣留征官兵併陳延鎮艱危情形等事  
奉

聖旨賑撫事難延緩姑着將新餉銀五萬兩速行那  
發卽查各處捐助解京的抵還新餉以補輕齎毋  
致缺額其延慶二府四年分加派併雜項及新增  
遼餉依議再寬一年以示軫念饑荒之意他郡不  
得比例該衙門知道覆奉

欽依欽遵去訖案呈到部該臣等看得秦省連年旱

荒赤地成如焚之烈餓殍相望黔黎入流賊之  
羣地無所產糧安從出先該臣部覆行人馬懋  
才之議將延慶等郡被災安塞等州縣一十四  
處卽爲停徵繼覆陝西在京諸臣之請奉

旨延郡元二兩年遼餉特准蠲免又先後留西安三  
年遼餉銀二萬兩聽延撫設法賑濟復該臣部  
覆樞臣疏議准延慶平三府除三年分遼餉先  
行兌抵年例外近因延賊未平將延慶二府崇  
禎四年加派及雜項并新增遼餉再寬一年

聖明軫念饑荒業無不周徹於窮黎矣今特捐金十

萬

欽命臺臣賑恤而又

命臣部開具應蠲停州縣欵項以

聞臣窮思之延綏一帶地災民亂方捐多金以賑貸  
寧忍椎髓而征求顧

皇仁之所爲霑漑於秦塞者至矣盡矣此外獨有民  
運又地方軍餉所爲待命者無已則將延安一  
府四年民運再蠲一年其新增遼餉平涼一府

亦與延慶二府一體寬停一年仍候事平再議  
總之拯民於水火之中弭亂於糜爛之際不如  
此不足以見

德意耳此外如有未盡蠲卹事宜仍聽該省撫按與  
賑臣酌議具奏可也恭候

命下臣部行令陝西撫按賑臣遵奉施行

崇禎四年三月初二日具

題本月初六日奉

聖旨這陝西被災州縣蠲留賑恤已有屢旨新增蠲

餉平涼與延慶一體停徵依議其延安民運係該  
鎮額餉再蠲一年是否與軍糈無礙還着再行確  
酌具奏欽此



覆延安民運緩征疏

題爲奉

命賑泰敬陳一得仰祈

聖裁以便遵行事陝西清吏司案呈奉本部送戶科  
抄出本部題覆山東道監察御史吳牲題前事  
等因崇禎四年三月初六日奉

聖旨這陝西被災州縣蠲留賑恤已有屢旨新增造  
餉平涼與延慶一體停徵依議其延安民運係該  
鎮額餉再蠲一年是否與軍精無礙還着再行確

酌具奏欽此欽遵抄出到部送司案呈到部該臣  
等看得民運惟正之供額餉三軍之命以民運  
而供軍糈是軍以衛民而民以養軍原自相須  
而無相礙也無奈年歲凶荒災祲疊歲地之所  
出不足糞其田而稅之所輸必欲取其盈是爲  
養軍而釀亂也延郡頻年赤地千里綠草不生  
清波難飽小民枵腹待斃實爲可矜

皇上軫念周至

命臣部以應蠲停錢糧款項開報來看夫錢糧額徵

額解蠲之則病軍地瘠民窮徵之則病民臣故酌

請延郡民運再蠲一年蓋延鎮民運各郡皆有不蠲他郡而蠲延郡緣百姓之骨髓已竭而有司之鞭朴徒施其勢必不能完而徒堅人從逆之心故萬不得已而出於此今蒙

皇上軫念軍糈有礙實出臣愚意想之外不若將此四年民運錢糧目前春夏之間仍行寬緩以少延窮民之殘喘俟秋收年豐寇平再議徵解

以佐軍旅之供億緩急得宜實爲便計至於該  
鎮邊餉臣部於京運年例銀兩按時給發無敢  
愆期庶窮氓受緩徵之惠而邊軍亦無缺餉之  
虞矣伏乞

勅下臣部轉行陝西撫按遵奉施行

崇禎四年三月十四日具

題本月二十二日奉

聖旨延安荒盜相仍依議寬征民運以恤災黎京運  
還及時給發以濟軍糈欽此

覆合水縣遺餉雜項蠲免一年疏

題爲併并水殘破情形賊去收拾事宜仰祈

聖鑒事陝西清吏司案呈崇禎四年五月十六日奉  
本部送戶科抄出總督陝西三邊軍務兼理糧  
餉太子少保都察院右都御史兼兵部右侍郎  
今戴罪楊鶴會同巡撫陝西都察院右僉都御  
史練國事巡按陝西監察御史李應期題前事  
內開全秦八郡素稱地瘠民貧者惟慶陽爲最  
慶陽所屬五州縣極瘠極貧者惟合水爲最殘

破之後編戶虛懸額派正賦并造餉七千七百  
有奇流移無可招錢糧無處徵非蠲免一二年  
不能培養元氣額供軍餉非另爲發補無以保  
固危疆等因奉

聖旨合水殘破情形覽奏惻然楊鶴暫行資給知道  
了還督率地方官多方撫綏以救子遺其錢糧軍  
餉事宜該部卽與酌覆欽此欽遵抄出到部送司  
案查本年三月內本部覆撫賑陝西監察御史  
吳甦題爲奉

命賑秦等事議將延慶被災等州縣民運錢糧卽爲  
緩徵四年加派并雜項新增再寬一年題奉  
欽依通行欽遵在案今總督楊鶴會題合水情形欲  
於額徵錢糧蠲免一二年額供軍餉另爲發補  
奉有酌覆

明旨相應具覆案呈到部該臣等看得合水邊圉疲  
邑連年荒旱民之苦於憔悴者已極今復遭際  
流賊肆害攻陷城池剽掠鄉村內外遠近俱遭  
荼毒雖督臣楊鶴加意招撫安集而一十八里

之民逃亡死徙盡成丘墟有可耕之地而乏承  
種之民良堪憫惻督臣爲民請

命欲於額徵錢糧蠲免一二年額供軍餉另爲發補  
誠恤災捍患收拾予遺之至計也但念臣部措  
處維艱額供軍餉別無可補法卽加派遼餉亦  
皆開薊計口之需先該臣部題覆御史吳姓之  
疏業將見年民運卽爲緩徵加派遼餉暫寬一  
年以蘇延民之困矣今經督撫會題前來臣部  
於無可奈何之中酌爲不得不寬之計合無將



合水四年分加派遼餉并新增襍項卽行蠲免  
一年其民運額餉姑待歲豐緩徵仍於彼處通  
融措給亦可少紓催徵之苦而弘招集之方也  
恭候

命下臣部移咨督撫及都察院轉行陝西巡按御史  
行令該縣遵奉施行

崇禎四年五月二十五日具

題本月二十八日奉

聖旨合水縣四年分加派遼餉并新增襍項俱蠲免

一年該縣止十八里民運額餉數應不多爾部便  
行查發不必又議緩徵別措以困災疲欽此

覆甘肅撫按茶院題議茶馬積弊疏

題爲直陳釐弊之要以裕

國用事陝西清吏司案呈崇禎四年九月初七日  
奉本部送戶科抄出甘肅巡撫白貽清會同巡  
按陝西監察御史楊通宇巡按陝西川湖監察  
御史顧其國題稱洪水之引初時因套虜吉囊  
往烏思藏送佛盤踞海上在洪水地方求款因  
雨增出洪水一引卽甘州引也甘肅涼三處中  
馬費取給此引在蘭州茶司驗收關分官茶貯

庫屬馬商茶本商發賣其票茶卽茶商之明也商人能蚤完茶引者是爲勤商賞給票茶之引赴西寧地方發賣年來弊出多端商茶色新味鮮各番爭趨求買官茶年遠陳腐各番飲之生病於是商茶行而官茶壅官茶不行招中爲難以此各番咸畏縮不來卽有勉其來者多以不堪駑駘充數今若遽爾盡革商茶恐各商裹足不來日後正引失額事非眇小臣檄行蘭州茶司將收貯官茶運發中馬其商茶暫行停止

俟官茶支領將盡再准商人報引如此則招中  
不難私販可絕其原設甘州茶馬司酌量地方  
改設莊涼而莊更近之洪水茶引令各茶商運  
赴交納每百篋量給本商脚價茶四篋餘茶當  
官閤分商茶給商發賣官茶貯庫中馬至收茶  
之時又有杜弊之法置造小鉄印三顆上立甘  
州官茶肅州官茶涼州官茶字樣商人運茶到  
日閤分畢卽以鉄印烙記發甘肅涼三處以便  
中馬又免途中抵換其退出商茶再不得入司

混納則積弊可除營馬得充實用至於虜馬在市甘涼肅莊四道屬款市久已杜惟西寧自火落赤物故衆子乞討納馬易茶在于城中嗣後樞臣梁廷棟昔任西寧改移鎮海堡虜馬易茶至今各酋納款如常似當仍舊益撫順之道宜爾等因崇禎四年九月初五日奉

聖旨該部覆議具奏欽此先於本月初六日該戶科抄出戶科管註銷事給事中馮元颺題爲摘叅邊疆大利大弊乞

勅所司必斷必行事內摘叅茶馬釐革規條覆

奏違限等因本月初三日奉

聖旨邊屯茶馬洵關大計奉旨經年何不奏報該撫  
按所職何事都着自行回奏張我續冒餉一案解  
冊旣集何難磨勘着作速覈議來說不得再延該  
部知道欽此欽遵通抄到部送司案查崇禎二年  
十月內該原任太子少保兵部尚書梁廷棟題  
前事等因奉

聖旨覽奏具關兵食大計屯政欲清地額須治豪強

鹽法欲禁私販須弁請託鑄銀收杜低假須嚴稽  
報茶司欲收番馬須革商票各款俱切中要弊鑒  
然可行該部還將每項單疏議覆近來吏治日偷  
不講積貯猝有緩急輒苦無策今後著撫按嚴督  
各地方官積穀備荒不時設法查驗仍每年造冊  
報部考核不得循例以空數塞責如有擅取贖銀  
緩視公儲者定寘重典不貸該部院卽條議規約  
來看該衙門知道欽此欽遵隨該臣部覆奉  
聖旨官茶易馬充實邊儲控馭虜番最關大計近來



奸弊日滋以致茶壅馬乏撤防啓弊深可痛恨着  
行該撫及巡茶御史嚴加釐飭凡票茶私販虜市  
洪水引等弊盡行禁革務期一遵

祖制永固邊疆如有仍踵前轍商販并筦茶各官一體  
重治文到之日該撫按先具釐革規條詳明回奏  
該衙門知道欽此欽遵通行該省撫按去後今經  
覆

奏前來相應具覆案呈到部爲照

國家設立茶法招商販運中茶於邊還貿易以實

邊是於綢繆邊界之中寓聯絡夷情之意法至  
善也乃法久弊生私販盛行而官茶壅矣商復  
滋奸以高茶自匿而以濫惡納官以致番族爭  
易商茶而官茶愈滯矣是茶中於番利歸於商  
而

國家反弗獲騰驤之用人次杜前弊當首革票茶  
蓋票茶雖以鼓各商之速於完引而各商遂借  
票茶之名每附帶私茶在於洪水地面發賣今  
票茶一革則洪水引自無而私茶自禁矣至官

與商分茶之時務宜高低均搭毋容茶商暗記  
作奸僥茶官親自抽分隨用火印烙記收庫底  
商不得獨擅其利而官茶皆成有用番族歸心  
上駟自不難得矣至於見在收貯官茶照撫臣  
所議將商茶暫停俟官茶中馬完日再准商人  
報引則官茶與商茶俱屬新鮮而奸商不得登  
壘射利是誠爲兩便之策也其西寧各酋爲火  
落赤遺種納馬易茶相機操縱既不爲彙當仍  
舊貫以示羈縻之意此外不得私開虜市庶私

茶自禁且以杜邊釁意外之虞矣既經撫臣具  
題前來相應依擬覆

請至於撫臣覆

奏稽延或緣該鎮道途窵遠往返駁查不無稽遲  
時日以致該科摘叅奉有自行回奏之

旨今覆

奏既到應否免其再

奏統惟

聖裁恭候

命下臣都移咨甘肅巡撫及谷都察院轉行陝西巡按御史及川湖巡按御史一體遵奉施行

崇禎四年十月初九日具

題十一月十九日奉

聖旨茶馬積弊全繇凭茶各官通同朦徇以致官茶濫惡日壅私販坐獲倍利國家何繇得騰驤之用殊可痛恨這所議整飭事宜尚未詳確已有旨著該撫按會同監視內臣悉心釐剔不得仍前玩縱該衙門知道欽此

查叅瑞藩蘇常未完糧折䟽

題爲

皇恩之普錫備隆諸臣之意見各執懇祈

聖明嚴行申飭以信

明旨以隆

親藩事陝西清吏司案呈崇禎四年十月初十日

奉本部送戶科抄出巡按直隸監察御史饒京

題稱蘇常二府所屬各州縣額派

瑞藩祿銀極多不滿五百至少而百餘金亦不能

完蓋此項銀兩官已不難於發解而獨是民難  
於領解耳漢中去三吳相傳水路約近萬里吳  
民所不習遊之路而又思彼地無熟識之人一  
點此解先有難色卽治以官法勉強領銀而到  
底藏躲支吾未肯出門一步又慮纍纍白鏹從  
何安頓卽同伴不過兩三人而盜賊風波之不  
測時刻在念卽幸而到矣一有賒折控告無門  
勢必至復回再往動輒經年此起解已久者而  
尚無批發也據蘇常二府冊開元年分一年之

未報起解者長洲縣去任署印推官王瑞梅也  
二年分一年之未報起解者長洲縣去任署印  
同知王良臣常熟縣見任知縣楊鼎熙崑山縣  
去任署印教諭朱濟之江陰縣見任知縣吳鼎  
泰無錫縣去任知縣陳其赤宜興縣調任知縣  
李獻廷也元二兩年俱未報解完者武進縣去  
任知縣韓國植報完七年者長洲縣去任知縣  
朱繼發報完元年者崑山縣被論署印同知蔣  
爾第去任接署教諭朱濟之報完七年者武進



縣去任知縣韓國植報完元年者宜興縣調任  
知縣李獻廷報完元年者無錫縣去任知縣陳  
其赤報完七年元年兩年者江陰縣見任知縣  
吳鼎泰太倉州見任知州劉彥吳縣去任知縣  
陳文瑞吳江縣陞任知縣熊開元嘉定縣陞任  
知縣謝三賓也常熟縣見任知縣楊鼎熙雖欠  
解崇禎二年分而七年元年俱已解到獲批與  
止報完者異報完起解之州縣是銀已發解第  
未獲批又與并不報完者異矣然總之批收未

獲而遲悞之咎何能免哉草疏方畢又接

瑞府承奉司移文并右承奉王敬來札內俱稱差  
官三年全無回覆

國主恐道路遙遠奸宄易生特差本司親到蘇常  
等處督奪（意謂或即可就本地交足更爲民  
便而各州縣其解戶再難以路遠爲言矣等因  
崇禎四年十月初七日奉

聖旨藩府錢糧自應嚴催督解何得歷歲積逋反稱  
萬里艱色風波不測等語明示脫却之路饒京着

俟回道嚴加考核未完的著刻期起解已解未完的著嚴行查比本內玩悞各官分別處治該部院知道欽此又該應天巡撫莊祖謨題同前事崇禎四年九月二十九日奉

聖旨已有旨了該部知道欽此欽遵通抄到部送司案查崇禎三年七月內該

瑞王常浩奏前事等因奉

聖旨覽王奏贍田額租元二年分尚未完解糧折等項亦多逋欠地方有司好生怠玩便著該撫按官

一併嚴查職名分別叅來還立限與他該部知道  
欽此欽遵隨該本部屢行催解去後今該直隸  
撫按會查拖欠數目及經管職名覆奏前來相  
應具覆案呈到部爲照祿折銀兩所以供  
宗藩祿養之需亦以展

朝廷親親之典况

瑞藩之國未久一切費用咸取給於贍祿尤當如  
期徵解仰

皇仁者也迄今各有司息緩督催逋欠未完旣經撫

檢會開未完各官職名前來所有見任經管各  
官相應分別罰治查州縣中有七年元年俱已  
解到獲批者常熟縣見任知縣楊鼎熙也報完  
七年者長洲縣去任知縣宋繼發武進縣去任  
知縣韓國植也報完元年者崑山縣被論同知  
蔣爾第去任接署教諭朱濟之宜興縣調任知  
縣李獻廷無錫縣去任知縣陳其赤也報完七  
年元年者太倉州陞任知州劉彥吳縣去任知  
縣陳文瑞吳江縣行取知縣熊開元嘉定縣行

取知縣謝三賓江陰縣見任知縣吳鼎泰也其  
元年未報起解者長洲縣去任署印推官王瑞  
栴也其二年未報起解者長洲縣去任署印同  
知王良臣常熟縣見任知縣楊鼎熙崑山縣去  
任署印教諭朱濟之江陰縣見任知縣吳鼎泰  
無錫縣去任知縣陳其赤宜興縣調任知縣李  
獻廷也其元二兩年俱未報起解者武進縣去  
任知縣韓國植也查已報完起解者罪在解戶  
但緣催比未力耳姑應免其叅罰其未報完起

解者則州縣之罪無可辭也見任知縣楊鼎熙  
吳鼎泰二員相應住俸戴罪督催去任推官王  
瑞梅同知王良臣教諭朱濟之知縣陳其赤李  
獻廷韓國植六員俟補官之日行見任地方各  
罰俸一年惟楊鼎熙雖有一年未解而有二年  
獲批是誠絕無而僅見者所當免其住俸者也  
以上住罰官員除見任吳鼎泰住俸督催外其  
去任各官仍行撫按責成接管官上緊督催通  
限三個月內完解如過限未完接管官一體住

俸其解役并包頭計時元珣用曹復等領銀使  
費延捱未完托言流賊作難風波不測此茲解  
之故智豈足取信所當行提家屬勒限比銷完  
日究罪歸結嗣後祿銀

瑞藩既差有承奉在本地督查當卽於本地及時  
交完甚爲便計不得復以路遠爲辭矣今該前  
因相應覆

請恭候

命下臣部移文應天巡撫及咨都察院轉行應天巡



按御史一體遵奉仍咨吏部知會施行

崇禎四年十一月初六日具

題本月初十日奉

聖旨這欠解藩祿各官住俸戴罪及補任罰俸俱依擬內楊鼎熙既能完解二年何故一年未解還著該撫按嚴查不隹免議見今各經筵有司都著遵限完解取批報部如再遲違指名叅處其茲後侵費抗延著撫按官嚴提追比不得輕縱赴解自有定規況刻期起解前旨甚明乃本內又

以藩差

官督查宜在本地及時交完明係便私違例成何  
功令該司官姑不究該衙門知道欽此

覆陝西撫按題請蠲停西安錢糧疏

題爲查勘西安北界被賊傷殘地方謹據實奏

聞仰祈

聖慈一併賑濟事陝西清吏司案呈崇禎四年十二月初五日奉本部送戶科抄出巡按陝西仍料理賑務監察御史吳牲題前事內開西安府屬同官白水蒲城澄城韓城郃陽宜君耀州遭賊荼毒臣查照難民文冊開報數目白水韓城郃陽蒲城澄城五縣共發賑銀三千六百二十九

兩九錢六分耀州同官二處共發賑銀八百四  
十兩一錢雜糧二百三十六石四斗宜君縣發  
賑銀二百八十九兩八錢臣雖拮据巡方之事  
不敢不於賑務竭盡心力以宣布我

皇上德意惟是西安府韓城郃陽蒲城白水澄城同  
官耀州此七州縣旣受流賊焚殺之慘又多兵  
馬征繕之累田地荒蕪戶口逃亡錢糧拖欠一  
時難完守令宜留撫字之恩戶部當寬考成之  
罰臣不得不爲災民請

命緩徵者也至延慶兩府盜賊未靖哀鴻可憫明年  
遼餉邊糧仍望

皇上再沛洪恩特賜蠲停等因奉

聖旨覽奏災患地方情形深用惻然賑過銀數知道  
了所請蠲恤事情該部酌議具奏欽此又奉本部  
送戶科抄出陝西巡撫都察院右僉都御史今  
降三級練國事題爲霪雨洪水異常城垣人民  
罹災謹類疏恭報仰祈

聖恩蠲恤以存子遺事內開天災流行惟秦地爲甚

大荒已久寇賊充斥兵興費煩黎民凋瘵已難  
拯救矣孰意禍變不已以歷年苦旱之地復罹  
水災其城郭墻垣或淋塌或衝崩在鎮安邠州  
乾州郿縣富平五處猶可自行修補若鄜州宜  
川宜君三處民窮帑竭日惟救死不暇又安有  
餘資以興城工見今臣與按臣權宜措處修築  
此意外之煩費也其人民田廬或河侵或沙壓  
在同州興平長安咸陽永壽高陵六處雖報被  
災幸不甚慘若華州華陰渭南朝邑四處村落

淪胥田禾一空房舍漂沒人民損傷此從來未有之災也臣謹會同按臣吳桂合疏祈

請伏願

聖慈特渙德音俯賜蠲豁俾水鄉暫免追呼而子遺或可少甦等因奉

聖旨該部知道欽此各抄出到部送司查得巡撫疏內被水衝塌州縣與巡按疏稱被賊殘傷州縣俱被災甚慘相應一併蠲恤具覆案呈到部該臣等看得西安係秦省要樞向稱饒裕願以供

億軍興可恃無恐柰因同官白水韓城邵陽  
城澄城宜君耀州等處北境接連延慶流賊結  
陣南下焚掠殺戮慘不忍聞以物阜民安之邦  
竟成天荒地老之象亦足悲矣孰意禍變不已  
至八月間靈雨如注渭水橫流城郭墻垣非淋  
塌則衝崩人民田廬非河侵則沙壓除被災未  
甚者姑置無論外若宜川宜君華州華陰渭南  
朝邑等處村落淪胥徧野瀾漫穀既無收麥仍  
未種真異常之變也天菑人害雜然並至按臣



雖有賑濟之施撫臣亦有修築之舉然而民命已傷民脂已罄無按爲民請

命欲緩徵民運仍寬議考成亦足暫舒目前之急但秦中正在興師沿邊亦復需餉一切本折不於西安將安取之此亦同室之鬪所稱披髮纓冠時也儻一議緩征將盡成停閣惟寓撫字於催科之中存緩二於用一之內省刑薄歛先公後私是在撫按有司自爲調停撫綏計耳至延慶兩府盜賊未靖四年遼餉邊糧已經蠲停揆時

度勢所謂徵之而無可徵者也五年錢糧亦姑俟事平秋成徵解則窮鄉暫免追呼之擾而予遺少獲休息之安矣恭候

命下臣部移咨陝西巡撫及咨都察院轉行陝西巡按御史一體遵奉施行

崇禎五年正月初六日具

題本月初九日奉

聖旨該省饑荒已極應蠲應停錢糧還着分別明白具奏欽此

覆陝西撫按查出四衛隱漏屯糧疏

題爲恭報查出四衛隱漏屯糧用佐軍需事陝西  
清吏司案呈崇禎四年閏十一月二十九日奉  
本部送戶科抄出巡撫陝西都察院右僉都御  
史今降三級練國事會同巡按監察御史吳姓  
題前事內開崇禎四年正月十六日准戶部咨  
該本部題覆兵科署科事在給事中劉懋題爲  
秦地之寇起於民饑平寇之最先於救民之饑  
本地之財自足本地之賑濟要在當事之實心

糗括本地之兵自足本處糗餉要在實事  
實力清查懇乞

聖明嚴加責成及早撲滅無從流其空言卸罪釀禍  
蔓延事因崇禎三年十二月初七日奉

聖旨陝西歲歉民饑地方官若能安集拊循豈至寇  
盜充斥據奏延慶平兵荒待賑楊鶴題留裁站銀  
兩已有旨了這公費會銀及貯庫贓罰等項俱着  
該督撫按道率屬撙節并多方措處設法賑助隨  
地撫綏仍將用過銀數賑過饑民造冊奏繳以便

課覈至四衛屯糧麥豆昔旣贏剩今何獨無卽  
清軍道臣按籍詳查用佐軍費該衙門知道欽此  
欽遵抄出到部移咨到臣除率屬樽節等項另  
冊具奏外其四衛屯糧案行清軍屯田道轉行  
西安府推官吏可法按籍嚴查去後續據呈報  
前來該臣查得

會典洪武年間每屯一項歲徵糧二十四石正糧  
十二石收貯屯倉聽本軍支用餘糧十二石給  
本衛官軍俸糧至永樂二十年因各軍辦納艱

難

詔免餘糧六石又至正統二年因支納不便令各軍  
正糧免上倉止徵餘糧六石嗣後守爲成例今  
潼關一衛尚有存羊之意至西安四衛不知起  
於何年將應納餘糧六石認作正糧於是有地  
者既顆粒不入倉無地者復按糧而兌地舉佃  
戶之納租入倉者每頃作六石之數盡兌於各  
軍而佃戶之餘租不可問矣

泰府較尉歲食糧七石二斗者竟兌去一頃二斗

畝是每頃止筭糧六石而所謂正糧十二石者  
竟安歸乎今合四衛共查出隱糧五千九百七  
十九石九斗又經駁回發道廳覆覈間續據查  
出西安左衛隱糧八十石七升前衛隱糧八百  
一十七石七斗二升後衛隱糧三百九十六石  
四斗三升右護衛隱糧二十四石三斗三升共  
續查出隱糧一千三百一十八石五斗六升零  
通共查出隱糧七千二百九十八石五斗六升  
此外見徵入倉者尚有六千五百一十一石滿

盤打算共一萬三千八百一十石除兌官軍外  
所餘尚多庶幾藉此以濟本省征剿之需是亦  
奏助兵餉之一策也至於四衛隱糧官識本官  
究罪第此弊相沿年久更代不常若必一一根  
究恐致借名騷擾於寇亂震隣之時更大不便  
等因崇禎四年閏十一月二十六日奉

聖旨屯糧隱漏情弊豈獨西安四衛若清查有法故  
舊開新所裨軍儲不少這查報尚未明盡該部酌  
議具奏欽此欽遵抄出到部送司案查崇禎三年



十二月內該本部覆兵科左給事中劉懋疏奉  
有

欽依咨行清查今據

奏報相應具覆案呈到部該臣等看得秦中

國初屯地之制每軍佃種一頃每頃歲納正糧十  
二石餘糧十二石俱收入倉以正糧支軍人月  
糧以餘糧支官吏俸糧此

舊制也至永樂年間因屯種辦納不前

詔免餘糧六石至正統年間又因正糧收倉支軍煩

瑣准令各軍兌支免其上倉嗣後竟以應納餘糧六石作爲正糧而兌給軍人竟視屯田爲已業而不知正糧仍在屯田之內也今准該撫按清查西安四衛隱漏屯糧七千二百九十八石連常徵屯糧六千五百一十餘石通共一萬三千八百一十餘石俱以崇禎四年起徵以常徵者供兵餉之用而以清出者濟征剿之需則兵餉充而撲滅易矣然此就西安四衛論也類而推之陝西衛所匪止西安四衛而餘衛屯糧如

西安之隱漏者不少伏讀

明旨赦舊開新清查得法所裨軍儲不少洵屬扼要  
探本之論是宜通行該省不拘邊腹衛所逐一  
清覈如有止徵餘糧六石而隱正糧十二石者  
仍須從長酌議應否一體追納方今軍餉告匱  
務在徹底清核除豪右之隱占供賦疆一軍儲  
何患

國計之不充哉恭候

命下臣部移咨陝西撫按轉行該省道府將查出四

衛屯糧七千二百九十八石以崇禎四年起徵  
專備征剿之用其餘續查各該衛所俟查明日  
另行具題併造冊送部查考

崇禎五年正月初八日具

題本月十二日奉

聖旨這查出西安四衛隱漏屯糧依議自崇禎四年  
照數起徵以備征剿之用其餘衛所不論邊腹著  
該撫按通行詳覈如有隱占一體清理造冊報部  
不許容徇欽此

覆延撫張福臻題請賑濟興屯事宜疏

題爲榆鎮災害並至危亡難保謹懇賑濟以救目前興屯田以圖永利事陝西清吏司案呈崇禎四年十二月十五日奉本部送戶科抄出巡撫延綏地方都察院右僉都御史張福臻題前事內開榆鎮倉庾雖空廩房尚在豈其初一米一豆之不入哉起於樂歲之本色輕爲改折遂致凶年之折價金歸子虛於是每食皆仰外販自雪深數尺而外販絕則烟火卽絕死者橫街填

巷若不急議賑救恐滿鎮盡爲餓鬼因思按臣  
有賑剩勸輸銀三四萬兩移取一萬兩爲拯救  
予遺之計此就榆鎮言也至延屬丘墟千里土  
賊打路幾斷西川叛寇搶掠賊衆兵寡賊飽兵  
饑渴望特頒賑資庶窮人不至盡化爲盜此就  
目前言也其榆鎮漸南地儘可耕只因荒凶盜  
起千里荒蕪臣日在行間勸種寧幾按臣有行  
查發牛種窮人之欲耕者借貸固有門矣臣謂  
屯田則選用屯官那借正項招徠流移分種地

土官出牛種農器屯戶出人力工夫無公費  
借銀兩秋成收穫平分借銀卽以分去糧還之  
如此則顆顆倉中積貯皆三軍性命也且東作  
查其勤惰秋成較其多寡從此草萊變爲桑麻  
倉庾積成殷富豐凶有備軍民兩賴若仍復外  
解本色須俟盜熄歲豐等因奉

聖旨該部酌議速奏欽此欽遵抄出到部送司案呈  
到部該臣等看得榆林鎮城係全陝之藩籬實  
根本之重地是必士馬飽騰軍民充裕而後可

外禦醜虜內防流寇奈因本色仰給外販自雪  
深數尺而外販絕軍民之凍餒而死者不知其  
數撫臣張福臻取賑剩銀一萬兩業經按臣吳  
牲慨發以救子遺而榆鎮之民庶幾有更生之  
望矣至於延屬地方四年荒旱千里丘墟更值  
大雪窮民無措壯者愈堅從賊之念瘠者盡轉  
溝壑之中情景如斯倍萬可憫雖云先經賑貸  
而望渴未止也雖云榆鎮已給而涓滴難遍也  
合將按臣賑剩捐助之金再行酌量支給以救



延民於水火之中是亦目前之急者也此外晉  
寇漸平則轉粟於冀并寧塞旣平則轉粟於靈  
夏又西安咸陽等處亦可泛舟轉粟繇渭達黃  
迤流而上以抵綏德等處如救焚拯溺然正自  
不容已也然而非永計也目今春和已屆東作  
伊始鎮南有可耕之地而一任荒蕪則粒食何  
日有司有勸農之責而不爲設處則闢土何期  
應如撫臣之議選用屯官招徠流移仍照按臣  
原行給發牛種行以腹裡民間分種之法課以

秋成借銀還糧之例延民其有瘠乎從此年穀  
順成軍民樂業然後漸復外解本色舊例將使  
草萊餽苴之民盡爲桑麻樂利之民在此舉也  
是在該撫道臣加之意耳既經會題前來相應  
覆

請恭候

命下臣部移咨陝西總督延綏巡撫及各都察院轉  
行陝西巡按御史遵奉施行

崇禎五年正月二十一日具

題本月二十五日奉

聖旨俱依議着行該撫按嚴督地方官實心料理務  
使支給無冒轉運勸種有法漸復外解本色舊例  
以永奠嚴疆欽此

覆陝西按院題敘捐助各官疏

題爲欽奉

聖諭事陝西清吏司案呈崇禎四年十二月初三日  
奉本部送戶科抄出巡按陝西仍料理賑務監  
察御史吳桂題前事內開崇禎四年正月二十  
六日捧接

聖諭欽此欽遵該臣題爲遵

旨條議措處之方在鼓人心之忠義以共救災危事

奉

聖旨秦地饑荒朕深軫念因軍興浩費不能多發帑  
金特諭郡縣有司多方措處據奏諸款忠義應有  
同心況地方職守攸繫責無可辭士紳利害相關  
情亦難忍卽着吳姓同該撫按倡率鼓勵悉心料  
理務期實濟仍將輸助數目詳明造冊奏報以憑  
稽覈旌勵欽此欽遵該臣移文各院部併行司道  
府州縣檄行有司徧諭鄉紳士民仰遵

聖諭各效忠君急公大義督臣楊鶴以七百元捐撫  
臣練國事白貽清各以一千金捐寧夏撫臣耿

好仁以三百餘金捐前按臣李應期以一千金  
捐甘肅按臣楊通宇以五百金捐鹽臣王與胤  
以七百人金捐茶臣顧其國以二百金雜糧三百  
石捐延寧餉臣張伯鯨以一百金捐甘肅餉臣  
郭應響以八十金捐延綏舊撫臣洪承疇盡捐  
一切公費未可以數計也繼是而布政司陳奇  
瑜分守關內道翟師雍前督糧道王復興各捐  
三百金前按察司楊弘備關南道蕭丁泰驛傳  
道劉嘉遇分巡關內道葉廷桂各捐二百金前

潼關道胡其俊捐一百一十三兩寧夏河東道  
葛如麟捐一百兩關西道林銘鼎徐如翰固原  
道王振奇各捐六十兩甘肅按屬隴右道顧其  
仁臨鞏道胡士容各捐二百兩西寧道鄭崇儉  
捐二百兩又以帶管四道捐四百兩靖虜道向  
胤賢肅州道許鼎臣各捐一百兩西延等府知  
府李之茂王文清張輦何龍禎王在臺華袞陳  
崇虞同知解應元等通判華其銓等推官史可  
法等知州范鳴珂知縣張希夏等有捐三百者

有捐二百一百兩者有捐五六十兩者有捐三四十兩者有捐一二十兩者以至佐領衛弁各捐輸有差總計一萬七千四百八十四兩四錢四分雜糧三百三十四石五斗本月初二日奉聖旨該部知道欽此又該吳姓題同前事內開奉

命按秦在京報捐者部堂則崔爾進翰林則解胤樾劉其德卿寺則李遇知府丞則馬鳴世科臣則趙京仕朱家棟臺臣則李玄王之良王道純張鳳翽趙志孟丘民仰吏部司官金煉色各部司



官郭宗憲王秉鑑袁養和賈師達張堪許國翰  
馬懋才王建侯李燦來于庭王之鼎張必大王  
懋學陞山東登州知府米世發中行則孫弘祚  
鮮經達李始棠大興縣知縣衛岑進士傅蒙庠  
翟四隅王拱極輦煇霍達王鏞關永傑艾毓初  
許無奇孫鵬房建極韓文敬劉承纓秦所式王  
鎖任中鳳潘益達趙翔鴻梁衝衛胤文舉人康  
國相鳴贊高應台兵馬曹昌祚王永祚范鉞在  
籍部堂則南企仲王之臣南居益韓繼思原任

巡撫則解經邦郝士膏洪如鍾翰林則南居仁  
卿寺則文翔鳳楊建烈宋師襄耿志緯王豫立  
科臣薛國觀臺臣則党崇雅原任台臣劉芳吏  
部司官衛先範張國紳孫必顯王應泰各部司  
官見任則魏良槐張書紳張燿郭封王素衡唐  
光耀翟棟張廷玉原任則南居業王漢傑陳所  
養王紹直王淑朴趙廣胤強思呼延恭王總衡  
張琨劉繼芳李修吉原任工部主事今削職爲  
民呂下問中行則劉曰俊田起鳳王聚奎杜繼

芳張鍾芳等光祿署丞孫璞孟思孔等治中郭  
宗振序班張鳳苞等司道見任秦一鵬焦源清  
常道立王弘祖孫紹統焦源溥謝宸曹暹王徵  
田時震祝萬齡原任張啓鶚馬逢臯周道直楊  
國柱喬巍邵可立牛維曜劉一全侯固張春馬  
朴王于陞賈克忠石聲諧廉第李采雷希煥陶  
爾德李一鰲王堯民辛思齊梁建廷知府田有  
年張繼孟同知趙虞佐等通判劉繼烈等推官  
楊惟揚等知州郭鼎藩等知縣文毓孟等舉人

黃運暉等官生孫啓禎孫啓祚等監生張繩祚  
等貢生張令聞等生員孫啓祔等儒官雷汪等  
義民王應龍等副叅遊守孫啓祥等指揮千百  
戶趙楫等鎮撫南紹仲等武進士劉符璽等以  
至佐領學博庶民之屬各捐輸有差總計一萬  
四千八百八兩三錢三分雜糧二千七百七十  
八石一斗內戶部侍郎崔爾進大理寺卿李遇  
知科臣趙京仕臺臣趙志孟丘民仰部臣王秉  
鑑王之鼎王懋學張堪進士房建極等在京捐

矣其家又捐又如孫瑛之捐五百金張繩祖之捐二百金孫啓禎等之各捐一百金士民孫啓祿王應龍等有捐一百及五六十金以上例得給扁示旌冠帶示榮至原任工部主事爲黃山一案革職爲民呂下問捐銀一千兩雜糧二千石旌榮之典或亦

聖恩所不靳等因奉

聖旨該部知道欽此欽遵各抄出到部送司案呈到部該臣等看得延慶荒旱四年遍野如焚流賊

擾害饑民蟻附

朝廷發金錢十萬

遣臺臣吳甡前往賑濟亦足彰

浩蕩之弘恩矣然而金錢有限饑民無窮其數不勝

也自賑臣吳甡有條議措處一疏而見任地方

督撫部司道府州縣等官如楊鶴等各效急公

大義或捐資斧或捐俸薪共輸銀一萬七千四

百八十四兩四錢四分雜糧二百三十四石五

斗以蘇涸鮒之轍秦中鄉紳如在京都寺翰林

科道等官崔爾進等在籍部寺翰林科道等  
南企仲等以至監儒武弁諸人或以維桑起念  
或以剝膚關心共輸銀一萬四千八百八兩三  
錢三分雜糧二千七百七十八石一斗以切纓  
冠之救該省之得存子遺以少舒目前之急者  
匪獨特

欽賑之金錢亦賴此捐助之資也賑臣列名上

聞請表揚以示激勸誠有不容已者在請臣既效急

公之大義在

聖明當錫嘉獎之美名相應分別旌敘其見任部堂  
督撫臺省諸臣俱移咨吏部紀錄其各府州縣  
知府知縣等官并在籍聽用鄉紳諸臣統候按  
臣復

命分別薦揚其餘致仕閑散等官監生士民人等酌  
量原捐多寡或給扁加旌或冠帶示榮悉聽按  
臣分別以示激勸至革職主事以下問捐助銀  
糧以三千計似倒囊宜念而宿憾可滌旌榮之  
典或亦所當及者也至各



度支奏請  
王府同爲

天潢誼切休戚奚止震鄰實抱剝膚捐助諒有同心  
應聽自行奏助庶好義者知所激勸而荒亂之  
邦其有瘳乎恭候

命下臣部移咨陝西巡撫及咨都察院轉行陝西巡  
按御史遵奉施行本部仍咨吏部知會

崇禎五年正月二十六日具

題本月二十九日奉

聖旨是欽此

再覆陝西撫按題請量免西安停殘地錢糧  
題爲查勘西安北界被賊傷殘地方謹據實奏

聞仰祈

聖慈一併賑濟事陝西清吏司案呈崇禎五年正月  
十二日奉本部送戶科抄出本部覆陝西巡按  
御史吳甡題前事并陝西巡撫都察院右僉都  
御史今降三級練國事題爲霍雨洪水異常等  
事內稱宜川宜君華州華陰渭南朝邑等處村  
落淹沒遍野瀾漫穀既無收麥仍未種真異常

之變也天苗人害雜然並至搆臣雖有賑濟之  
施撫臣亦有修築之舉然而民命已傷民脂已  
罄撫按爲民請命欲緩徵民運而寬議考成亦  
足暫舒目前之急但秦中正在興師沿邊亦復  
需餉一切本折不於西安將安取之倘一議緩  
徵將盡成停閣惟寓撫字於催科之中存緩二  
於用一之內省刑薄斂先公後私是在撫按有  
司自爲調停撫綏計耳巡撫兩府盜賊未靖  
四年遼餉邊糧已經蠲停揆時度勢所謂徵之

而無可徵者也五年錢糧亦宜姑俟事平秋成  
徵解則窮鄉暫免追呼之擾而子遺少獲休息  
之安等因崇禎五年正月初九日奉

聖旨該省饑荒已極應蠲應停錢糧還着分別明白  
具奏欽此欽遵抄出到部送司卷查崇禎四年十  
二月二十五日戶科抄出陝西巡撫練國事題  
爲續報漢南水災並祈

聖恩減緩稅糧以恤子遺事內開據分巡關南道梁  
鼎賢呈稱漢中高山層疊江流直亘土田磽确

多半不毛况

藩封新建繼以流賊披猖不期霪雨爲災河伯肆  
虐南鄭縣衝崩田地共五千一百五十九畝城  
固縣共衝田地五千五百九十六畝洋縣衝淤  
田地共一萬五千六百七十七畝漢中衛衝崩  
田地一萬一千八百八十六畝沔縣寧羌州畧  
陽縣寧羌衛各水渰禾苗無收者十分之四田  
土衝決者各十分之二褒城縣秋禾渰沒罄盡  
田地衝崩七百六十三畝鳳縣渰沒秋禾人口

損傷灾居十分之五西鄉縣挨河滄沒被灾十分之一沔縣千戶所屯田臨江河者衝崩十之二三伏乞將衝崩入河田地蠲賦減額其禾雖滄沒而地猶可耕姑俟來年徵糧等因奉

聖旨該部酌議具奏欽此又該寧夏巡撫耿好仁題爲地方災傷事內開楊芳等集餘丁劉應龍等被水滄沒全減田共五十九頃九十五畝六分該糧六百五十五石九斗二升六合相應題

請蠲免停徵至靈城逼近大河見今築堤導之西流

萬一河伯肆虐靈難保全等因奉

聖旨灾荒准與酌議濱河城堡宜平時培養疏導使  
水不爲害若聽其衝決要地方官何用耿好仁着  
督率料理不得諉卸該部知道欽此欽遵各抄出  
到部送司具覆間今奉

前旨相應併覆案呈到部該臣等看得天灾流行何  
地茂有然未有如秦地之苗害金至而蔓延且  
久也粵自延慶荒旱四載赤地如焚以致饑饉  
饑民相聚爲盜剽掠庄村殘破合水安塞甘肅

等縣又慘毒西安北界如耀州同官白水蒲城澄城韓城邵陽宜君等處殺戮焚掠往來蹂躪真是慘不忍聞旣而霪雨連綿洪水氾濫在西安所屬則宜川宜君華州華陰渭南朝邑漢中所屬則南鄭城固洋縣西鄉沔縣寧羗州畧陽縣褒城鳳縣漢中衛寧羗衛沔縣千戶所衝決地土渰沒田禾漂流民舍倒塌城垣大約十之三四而續報漢南地方爲數差少至寧夏楊芳等渠餘丁劉應龍等衝塌屯地五十九頃九十



五畝六分該糧六百五十五石零亦苦錢糧無  
出撫按爲民請命議欲蠲賦減糧以甦民困臣  
部查得邊鎮民運錢糧悉供軍儲計口授食蠲  
一分則軍虧一分之餉緩一日則軍遲一日之  
糧見在移文催督無容再行議蠲議停者也至  
加派遼餉亦係援遼急需先經按伍定派每畝  
派銀九釐崇禎四年本部題奉

欽依每畝復加派三釐欽遵在案今陝西用兵勦賊  
急須新餉而延慶邊地兵荒業經本部覆按臣

吳甡疏議將延慶新舊加派銀五年准其緩徵  
又將平臨鞏三府新加派銀再准蠲停五年一  
年又將延慶平三府及邠耀二州同官淳化三  
水白水永壽長武麟遊鳳縣鳳河十一州縣新  
加三釐遺餉蠲免五年一年其於邊塞州縣固  
已仰體

皇上優恤災黎至意曲爲軫念矣乃該撫按入有蒲  
城等州縣被賊被水傷害蠲停之請查秦中沿  
邊兵荒延慶二府新舊加派先已蠲停平臨鞏

三府及邠耀等十一州縣新加三釐又已蠲  
五年一年此外各邊軍餉待哺方殷合西漢鳳  
三府無所取給臣前疏寓撫字於催科之中蓋  
亦有不得不然者耳今奉分別蠲停

明旨臣於無可蠲停之中量爲酌恤除同官白水永  
壽邠耀二州鳳縣業經前疏蠲免新加三釐五  
年一年外所有西安所屬蒲城澄城韓城郃陽  
鎮安乾州富平興平長安咸陽高陵華州華陰  
渭南朝邑鳳翔所屬郿縣漢中所屬南鄭城固

洋縣西鄉畧陽褒城沔縣寧羗州寧羗衛漢中  
衛沔縣千戶所各州縣錢糧誠慮蠲停太繁則  
軍餉愈缺量於各州縣新加三釐內每畝蠲免  
一釐止於五年一年少示優恤至於衝崩田土  
或未足以見德卽於本邑無災田畝量爲裒益  
總不出於一釐之外至寧夏楊芳等渠餘丁劉  
應龍等衝塌屯田屯糧爲數不多量免一半以  
甦屯困其靈城逼近大河尤當預爲修築是亦  
固圉卹民之急務也恭候

命下臣部移咨各巡撫并咨都察院轉行陝西巡按  
御史遵奉施行

崇禎五年三月初七日具

題本月初十日奉

聖旨這量免錢糧俱依議仍着該撫按榜示民知不  
許婪猾官胥派徵擾累欽此

覆甘撫西寧加糧致變疏

題爲西寧加糧致變道臣陸調非宜乞

勅查勘以破欺蔽以靖邊疆事陝西清吏司案呈崇  
禎五年正月二十六日奉本部送戶科抄出巡  
撫甘肅等處地方都察院右僉都御史白貽清  
題前事內開西寧孤懸一隅番虜雜居自開疆  
以來幅員雖廣人民稀少僅以水地承種尚多  
荒蕪何暇計旱地哉邇來生齒漸繁歸附日衆  
湟屬遂無有不耕之旱地矣道臣王維章念有

邊事以來卽拋荒地土尚欲開墾起科乃有種  
地不納糧如西寧者乎委屬驗勘仍溫詞怡氣  
求謀紳弁每籽一石納糧一斗是十分取其一  
也隨呈報各院而奸民以歷來不納糧之故不  
欲輸官羣聚城下俟道臣自莊回湟之日擁前  
喧囂告免道臣難以理屈策馬入城衆民仍欲  
告免見城門閉阻漸茂甘昇一倡百和遂起燬  
房搶糧之端道臣恐變起不測方發免帖旋卽  
解散而倡亂首惡李漸茂甘昇議配似未盡辜

但奉量懲之

下矣敢重督過焉其水旱地畝起科糧草悉照該道  
所議原報召墾拋荒水地共認糧一千二百三  
十八石七斗八升三合草一萬二千三百八十  
七束八分三釐各川旱地共認糧二千八百二  
十七石九斗一升九合四勺草二萬八千二百  
七十九束一分九釐四毫并今續認旱地糧七  
百石以上通計水旱地糧共四千七百六十六  
石七斗二合四勺草四萬六百六十七束二釐



四毫內除原捐舖房糧六十五石草六百五十  
束查係當年起課見徵外其餘水旱地糧四千  
七百一石七斗二合四勺草四萬一十七束二  
釐四毫俱於崇禎五年起科如數徵收以濟軍  
需其擁譟首惡李漸茂甘昇合依放火故燒人  
房屋及積聚之物律減杖一百徒三年照例納  
贖共紙贖銀三十六兩一錢二分五釐抵充年  
例等因崇禎五年正月二十二日奉

聖旨該部覈議具覆欽此欽遵抄出到部送司案

崇禎四年四月十五日該巡按陝西監察御史  
楊通宇題前事等因奉

聖旨王維章清查地畝意在急公知道了既已調用  
不必復任着責成見在監司核定呈詳督撫按官  
具奏其前時擁譟諸姦量懲一二首惡餘姑免究  
仍諭靜聽查議不得再有鼓煽自干重譴其起科  
量與從輕以恤窮邊該部知道欽此通行欽遵在  
案今奉前因相應具覆案呈到部該臣等看得  
任土作貢從古已然西寧卽僻處天涯夫非王

土乎何輸納止於水田而旱地全不交納也。豈不思拋荒尚欲開墾而成熟及春起科任土作貢之謂何。此前道臣王維章所以欲清查而濟邊也。乃清丈之令甫下而要挾之勢遂張。聚眾城外燒燬莊房。斯亦逞狂之甚矣。該道權出免帖以散此其不逞之勢亦以群愚易動難戢故爲此不得已之計也。若首倡之李漸茂甘昇在前既有欺隱占匿之罪。在今又有要挾鼓煽之行。孽自作之法安道乎。唯是仰體

皇上量懲之旨姑開一面以擬配贖斯亦法外之仁  
矣通計前後所報水旱地糧共四千七百六十  
六石七斗二合四勺草四萬六百六十七束二  
釐四毫內原捐舖房糧六十五石草六百五十  
束係四年起科其餘俱係五年照數徵收仍載  
入考成以稽完欠庶窮邊無騷擾之虞而軍  
國得邊儲之益矣李漸茂等紙贖銀兩仍令解抵  
該鎮年例取實收報部查考恭候

命下臣部移咨陝西甘肅督撫并咨都察院轉行巡

按御史遵奉施行

崇禎五年三月初七日具

題本月初十日奉

聖旨是本內李漸茂脫李字補正行欽此

覆陝西藩封用過錢糧設法抵補疏

題爲

藩封典禮告竣謹報用過錢糧以祈

聖鑒事陝西清吏司案呈崇禎四年八月二十五日  
奉本部送戶科抄出巡按陝西監察御史李應  
期會同勛陽巡撫梁應澤陝西巡撫練國事查  
得

瑞王之國安置鋪設供應等項用過銀一十萬六  
千六十二兩二錢屢行該司查覈咸稱並無冒

破情獎內除南鄭縣安置二司八所家器銀

百七十七兩四錢八分原係初建

瑞府各商拖欠官銀追還之數應准開銷不應抵

補實借過銀一十萬五千七百八十四兩七錢

二分俱係借支通省邊餉錢糧應以原題留天

啟七年崇禎元年匠價兵荒馬扣支直及扣三

年一閏共銀六萬八千二百九十九兩漢興棚

船等項變價銀一千五十八兩一錢九分八釐

六毫推官吏望鼓鑄積餘銀四百三十二兩二

錢

韓宗融歿等十二位捐祿銀三千二百八十一兩  
七分以上四款共計銀七萬三千七十兩八錢  
六分八釐六毫抵補前借糧銀外尚少不敷銀  
三萬二千七百一十三兩八錢五分一釐四毫  
原奉

明旨不敢借動倉穀議將崇禎四年通省官吏師生  
人等閏月銀二萬三千八百九十四兩內延慶  
平三府該銀三千五百二十二兩六錢五分七



釐九毫三府爲盜賊殘破之餘所屬錢糧奏  
旨寬徵而閏月一項似應除去免徵并四五兩年  
價銀七千四百七十八兩一錢二項共銀二萬  
七千八百四十九兩四錢四分二釐一毫抵補  
前銀外尚少不敷銀四千八百六十四兩四錢  
九釐三毫俱行該司陸續設處抵補等因崇禎  
四年八月二十一日奉

聖旨該部知道欽此欽遵抄出到部送司卷查崇禎  
元年十一月內該陝西巡撫胡廷宴題

瑞王之國一應供應鋪設等項借過未補銀兩  
於通省倉糧內動支變價補還等因奉

聖旨據奏瑞王之國借用過銀一十萬六千餘兩有  
無破冒着行巡按御史再加覆覈具奏該省方因  
災荒倉糧急藉賑救或尚有別項堪抵錢糧再行  
設法查處不得借動倉穀該部知道欽此欽遵隨  
經移咨都察院轉行巡按御史覈議去後今該  
前因除疏內匠價抵補一項應聽工部議覆外  
所有別款相應具覆案呈到部爲照秦地鼎建

瑞府王費浩繁指處已屬艱難乃迎

王供應之費

宮中鋪設之資更爲繁鉅計借用過邊糧等銀一  
十萬六千餘兩既經按臣覆覈查無虛冒情弊  
相應准令開銷所有前項借過銀兩除扣抵外  
尚少不敷銀三萬二千七百一十餘兩先該撫  
臣胡廷宴議於通省倉糧內變價抵還原奉

明  
不准動支倉穀着查別項抵補今該按臣議將  
崇禎四年西鳳漢臨鞏五府并興安州官東師

生人等閏月銀抵補益秦地災荒則加派搜括之事難行而三年一閏似衆繁易舉之法有當此外尚少不敷銀四千八百六十四兩零行令藩司陸續設法抵補此誠急公之至誼而借箸之良籌也相應依議覆

請恭候

命下臣部移文陝西巡撫并布政使司及各都察院轉行陝西巡按御史一體遵奉施行

崇禎四年九月初八日具

題本月十一日奉

聖旨依議本內供應之下有脫字補正行欽此

4

覆西安四衛隱佔屯田疏

題爲

宗藩隱佔全衛屯田不軌大弊懇乞

聖明亟

勅清查以釐積蠹以裕軍儲事陝西清吏司案呈崇  
禎四年閏十一月二十五日奉本部送戶科抄  
出陝西巡撫今降三級戴罪練國事題稱先准  
戶部咨會前事隨即批行各該司府等官逐一  
查核回覆前來該臣會同按臣吳甡看得西安

屯田之制

國初設有左右前後四衛兼以首建

秦藩又設左右中三護衛誠重之也嗣於宣德年  
間

秦藩具疏辭去中左二護衛查

會典內載右衛改爲中護衛左護衛改爲神武右衛  
中護衛改爲神武前衛此與

聖書內調京操脩之語相符其寧夏中衛或卽西  
中衛亦於宣德年間調去者董元芳止知中護

衛而尚未知有左護衛蓋軍已調去而地留入  
四衛以幫防邊守門較尉等軍故迹若涉於隱  
佔耳茲臣等奉

旨清核查出所遺地共六千一百二十二頃零內各  
軍自種三千五百二頃零蓋不爲少矣軍多屯  
少以添設之軍認空閑之地法可通融無煩更  
議唯是佃戶承種地二千六百二十頃雖每頃  
納糧六石然籍非軍伍冒種軍屯非霸佔而何  
但念年遠人更傳買爲難若一旦奪去萬口嗷



嗽恐滋他變今議每頃再加徵糧二石每頃  
增五千二百餘石用佐軍需亦便計也第

會典開載西安屯田共二萬九千四百四十四頃今  
查各衛總數止二萬八千一百二十一頃較之  
會典數目尚少一千三百二十三頃當有着落然歷  
閱二百餘年或有河侵山崩之變更若必欲細  
核須西安屯地逐處丈量當兵荒之時恐不堪  
此搔擾不如姑立案存照以俟首發之得大體  
等因崇禎四年閏十一月二十一日奉

聖旨這四衛地土必多侵隱情弊故去籍難查應否  
失額不問據稱見存的軍屯免議佃種加糧地方  
錢糧應否聽其私幫占業着該部確議董元芳誣  
計親藩好生可惡着該撫按從重究擬具奏欽此  
同日又抄出

秦王誼漈奏爲藩臣無辜遭誣累冤幸遂昭雪等  
事內稱臣府原設三護衛自臣

祖秦康王於宣德四年具疏懇辭中左兩衛遺留  
屯田俱在四衛有石碑有清冊各徵糧昭然證

也捏誣之情盡虛侵隱屯田毫無撫按覆奏自  
極周詳不待臣煩聒致喙也但董元芳以么麼  
奸棍僞稱守備誑言於

至尊之前伏乞

勅下撫按正法等因崇禎四年閏十一月二十一日  
奉

聖旨王恪遵藩度朕素鑒知屯地事情撫按官具奏  
甚明董元芳狂肆妄訐已有旨究擬不必以此介  
意該部知道欽此欽遵抄出到部送司卷查崇禎

三年八月內該巡按直隸等處監察御史袁弘  
勲題前事等因奉

聖旨該省西安屯田衛司各有庫冊秦藩有無侵隱  
一覈自明這所奏着行該撫按查確來說還立限  
與他董元芳解發彼處聽質雷希賢等查是否差  
請封祿人役另行奏奪該部知道欽此又該

秦王誼泄奏爲辯明冤誣疏通血脉等事奉

聖旨覽王奏使令一衛餘丁屯糧盡歸公帑恪遵舊  
制事理昭然董元芳如何挾私妄奏本無煩再勘

念王意急欲自明着該撫按官遵限確查具奏  
部知道欽此欽遵通抄到部送司通行該省撫按  
確查勒限回奏去後今據該省撫按會奏前因  
相應具覆案呈到部該臣等看得秦地爲三邊  
衝要之區故

國初設立西安左右前後四衛以爲固圉之計  
秦藩乃桐封首建之邦復設左右中三護衛以重  
帶礪之盟蓋設軍以衛國還藉屯以養軍耳迨  
宣德年間

秦藩控辭中左二護衛止留一右護衛以供使令  
已徵該藩謙讓之誠所辭二衛一改爲神武右  
衛一改爲神武前衛所謂調京操備者是也然  
軍去屯留且地至六千頃之多當時有司軍衛  
衙門豈不耳而目之未有不設法安插茫無歸  
着一任虛懸以待

秦藩之隱佔者是董元芳所云六千頃實非中衛  
一衛之額乃中左二衛之額其止云中衛者不  
知有左衛故也當年屯地有無歸着世遠籍無

固無可考今查西安等四衛共多查出地六千  
餘頃適與前項遺留地額相同則所遺之地分  
隸於四衛明矣設使

秦藩果欲隱當在調衛之時及查

秦藩辭衛與調衛俱係宣德年間先後一時先既  
已辭後必不佔如後卽欲佔何如先不控辭之  
爲得也且

秦藩首封贍地最多素稱富饒當不藉此遺屯以  
干隱佔之戾第今查出遺地六千一百二十二

頃零除各軍自種三千五百二頃外餘係佃戶承種內有

秦藩應役之人籍非軍伍佃種屯田雖輸課以養軍實相傳爲已業迹頗類於佔耳今撫按議稱一旦奪去恐滋騷擾之變議令每頃除原納糧六石外再加二石臣等查得西安屯地素稱膏腴每頃於原納糧六石外再加四石其納十石亦不爲厲計屯二千六百二十頃可得糧一萬四百餘石用抵該省軍需之數亦便計也及查



大明會典欵開西安屯田共二萬九千四百四十四頃今除總查出二萬八千一百二十一頃外較原額尚少地一千三百二十三頃零歷今二百餘年河浸山崩固所不無然既有滄海卽有桑田何失額至千餘頃之多似難遂置不問者也但履畝丈量尤慮驛驢是在撫按檄令有司督同各該屯衛等官細簡老冊逐一查訪如有隱佔等項許其自首免罪務得原額輸課佐軍此又撫按所當再爲綜覈者也至奸棍董元芳僞

稱守備誣訐

親藩罪在不赦葉奉

明旨着撫按從重究擬臣等無煩更議矣相應覆  
請恭候

命下臣部移文陝西撫按一體遵奉施行

崇禎四年十二月二十六日具

題本月二十九日奉

聖旨民佃軍屯本宜清理但念相沿已久姑依議加  
糧以免滋擾其缺額頃數還着該撫按責成衛弁

有司設法稽查如有奸豪隱佔抗拒叅拏重處自  
首者准與免罪務清原額用濟軍需欽此